

SCRIPT OF MORNING GOJRI NEWS BULLETIN 4SEP 1015 HRS

مارننگ گو جری نیوز بلیٹن مورخہ 4 ستمبر 2025

یوہ آکاشوانی جموں ہے باغ علی طاہر تین خبر سُنو۔

IMCT

مرکزی وزارت داخلہ غی طرفوں تشکیل دتی گئی 7 ممبری اعلیٰ سطحی بین وزارتی مرکزی ٹیم گزشتہ شام نویں دلی تیں جموں پُچ گئی ہے جہڑی جموں صوبہ غا 10 ضلعان گو دورو لان تیں بعد آئیندہ 7 ستمبر نانہہ واپس نویں دلی روانہ ہو جے گی آکاشوانی جموں غا نمائندہ نے جانکاری دیتا واں دسیو ہے جے اسم ٹیم غی قیادت قدرتی آفات غا منجیمنٹ بارے قومی اتھارٹی این ڈی ایم اے غا کاروائیاں تے مواصلات غا صلاحکار کرنل کے پی سنگھ کر رہی ابیں یاہ تیم اج جموں سانہہ تے کٹھوعہ ضلعان گو دورو لاوے گی جد کہ کل یعنی 5 ستمبر نانہہ ادھمپور ریاسی تے رام بن ضلعان گا دورہ ور روانہ ویگی ٹیم غی طرفوں 6 ستمبر نانہہ کشتواڑ تے ڈوڈھ ضلعان غو دورو لان غو پروگرام ہے جد کہ راجوری تے پونچھ ضلعان غو دورو آئیندہ 7 ستمبر نانہہ کیو جانگو۔

LG INCESSANT RAIN

جموں کشمیر مانہہ لگاتار بارشیاں تے سیلابی صورتحال غی لیفٹیننٹ گورنر منوج سنہا نے سننیر عہدیداراں تیں جانکاری لی ہے اُن نانہہ متاثرین نانہہ مہیا کرائی جان آلی ریلیف بارے دسیو گیو اس موقع ور ایل جی موصوف نے عہدیداراں نانہہ ہدایت کی ہے جے متاثرین نانہہ پانی تیں لگن آلی بیماریاں تیں محفوظ رکھن بارے وی اقدام کی اجنیں اُنہاں نے سیلاب متاثرین نانہہ تمام ضروری چیزاں غی فراہمی نانہہ یقینی بنان غی ہدایت وی کی اُنہاں نے ضلع راجوری کانگری سندر بنی علاقہ مانہہ ہوا واقع مانہہ متاثرین سنگ تعزیت کرتا واں متاثرین غی بہبود تمنا ظاہر کی۔

Dy CM DMOs ATTACHED

عام لوکاں غی طرفوں کی جان آلی شکایتاں غ و نوٹس لیتا واں نائیب وزیر اعلیٰ سریندر چودھری نے 2 جلے مانننگ افسراں نانہہ اٹیچ کردتو ہے اس سلسلہ مانہہ جاری اج حکم نامہ مانہہ کہیو گیو ہے جے ڈی ایم او کیوارہ ممتاز احمد جنغے کول ڈی ایم او بانڈی پورہ غو اجی چارج وی ہے نانہہ فوری طور ور ڈائریکٹر جیولاجی ایند مانننگ جموں فا دفتر مانہہ اس سلسلہ مانہہ شکایتاں غی تحقیقات کیا جان توڑی اٹیچ رکھیو جانگو۔ اسے طرح غا اک ہور حکم نامہ غے تحت ڈی ایم او سانہہ محمد سرفراز نانہہ ڈائریکٹوریٹ جیولاجی اینڈ مانننگ سرینگر غا دفتر مانہہ فوری طور ور اٹیچ کیو گیو ہے حکم نامہ مانہہ ڈی ایم او کٹھوعہ ڈی ایم او سانہہ گو اضافی چارج دتو گیو ہے۔

SATISH FLOOD AREAS

ٹرانسپورٹ محکمہ غا وزیر ستیش شرما نے ضلع جموں مانہہ سیلاب تیں بچن غی تیاریاں تے ریلیف کماں نانہہ مضبوط بنان غی اک فیصلہ کُن کاروائی غے تھت سیلاب غی زد مانہہ آنگا اندیشہ آلا علاقان تے بکھ بکھ متاثرہ علاقان غو دورو لایو اُنہاں نے نئی بستی نارانا پلانوالہ دھار چھنی پلاتاں گگریل زتیال تے گجریل گرایاں غو

دورو لایو اپنا دورہ غے دوران جناب شرما نے دریا مانہ پانی غی سطح گو معائنو کیا جان تیں علاوہ انتظامیہ کی طرفوں زمینی سطح ور کیجان آلی کاروائیاں غو جائیزو لایو اُنہاں نے اس موقع ور مقامی رہائیشاں سنگ ملاقات کرغے اُن غی تشویشاں نانہ وی سنیو وزیر موصوف نے افسراں نانہ ہدایت کی ہے جے سیلاب غا خطرہ مانہ آیا کُنباں نانہ بروقت امداد مہیا کرائی جائے اُنہاں نے ہر شہری غا تحفظ تے خیریت نانہ ترجیح دین غی ضرورت ور زور پایو۔

JK MEDICAL SEATS

جموں کشمیر مانہ طبی تعلیم نانہ فروغ دتا جان گا اک بڑا اقدام گا طور ور قومی میڈیکل کمیشن این ایم سی غی طرفوں 190 اضافی ایم بی بی ایس سیٹاں بارے اجازت نامہ غا خطوط یعنی ایل او پی جاری کیا ہیں اس راہ گورنمنٹ میڈیکل کالج بارہمولہ گورنمنٹ میڈیکل کالج ڈوڈھ تے گورنمنٹ میڈیکل کالج کٹھوعہ واسطے 50-50 اضافی ایم بی بی ایس سیٹاں نانہ منظوری دتی گئی ہے جدکہ گورنمنٹ میڈیکل کالج جموں تے گورنمنٹ میڈیکل کالج سرینگر واسطے 20-20 اضافی ایم بی بی ایس سیٹ منظور کی گئی ہیں اس راہ جموں کشمیر یو ٹی مانہ پہلاں تیں منظور شدہ کل 1185 سیٹاں تیں بدھا غے ہُن 1375 سیٹ کردتی گئی ہیں۔

AKHNOOR RESCUE OP

بی ایس ایف جموں کشمیر پولیس تے ایس ڈی آر ایف تے این ڈی آر ایف نالے سول انتظامیہ غی طرفوں کیجان آلی اک سانجی تے فوری کاروائی مانہ کل گڑکھال علاقہ غا فتو کوٹلی گراں تیں 47 افراد نانہ باحفاظت محفوظ مقام ور منتقل کی وگیو یوہ گراں شدید سیلاب غا کیرہ مانہ آگیو تھو اس کاروائی مانہ 2 ہیلی کاپٹراں غی مدد لی گئی ان رہائشیاں نانہ فوج غی مولو بتالین مانہ منتقل کیو گیو ہے۔

IAF EVACUATION

ضلع انتظامیہ ادھمپور تے بھارتی فضائیہ گا بہترین تال میل تے تعاون سنگ بسنت گڑھ علاقہ تیں 2 مریضاں نانہ کامیابی سنگ گورنمنٹ میڈیکل کالج ادھمپور منتقل کیو گیو یوہ علاقو لگاتار بارشاں تے زمینی تودا کھسکن غی وجہ نال ناقابل رسائی ہو گیو تھو ان مریضاں غا ناں نظیر احمد تے اوم پرکاش دسیا گیا ہیں جن نانہ فوری طبی امداد غی ضرورت درپیش تھی اس سلسلہ مانہ ڈپٹی کمشنر سلونی رائے غی قیادت مانہ ضلع انتظامیہ ادھمپور نے ان مریضاں نانہ بھارتی فضائیہ غی مدد سنگ اسپتال منتقل کرن مانہ فوری کاروائی غو مظاہر کیو ہے۔

DC UDH SHETTER CAMPS

ادھمپور غی ڈپٹی کمشنر سلونی رائے نے کل سیلاب تیں متاثرہ کُنباں غا افراد واسطے قائم کیا گیا کیمپاں گو دورو لاغے ریلیف بندوبست غو جائیزو لایو اپنا دورہ غے دوران اُنہاں نے متاثرین سنگ ملاقات کی تے اُن غی تشویشاں نانہ غور نال سنیو ور یقین دوايو جے اُن ناہ بروقت ریلیف مہیا کرایا جان غے نال نال لگاتار انتظامی تعاون دستیاب کرایو جانگو ڈپٹی کمشنر نے متعلقہ عہدیداراں ناہ ہدایت کی جے وے کیمپاں مانہ مقیم سیلاب متاثرین نانہ تمام ضروری سہولت تے خدمات میسر کراویں اُنہاں نے

تمام محکماں نانہ زیادہ توں زیادہ چوکسی برتن تے متاثرین نانہ فوری امداد مہیا
کران غی بدایت وی کی اس موقع ور ڈیسی موصوفہ نے سیلاب تیں متاثرہ خانداناں
مانہ ریلیف غو سامان قی تقسیم کیو۔
